

Ang **NGUROB** sang Mt. Canseron

New People's Army, South Central Negros Guerrilla Front

November 2019

**Paslawon ang de Facto Martial Law sang
Rehimeng US-Duterte! Ilunsar ang
Armadong Paghimakas sa Kaumahan!**



Isulong ang Inaway Banwa sa Mataas nga Halintang! Lutuson ang Pasismo sang Rehimeng US-Duterte!

Ginabaha sang nanari-sari nga mga kritisismo gikan sa lokal, nasyunal tubtob sa internasyunal nga mga pamahayag sang mga komunidad kag progresibong organisasyon ang ginhimo nga dulungan kag ilegal search sa mga opisina sang progresibong organisasyon kaangay sang Gabriela, National Federation of Sugar Workers (NFSW), Anakpawis, Bayan Muna kag Kilusang Mayo Uno (KMU) sang gintingob nga pwera sang pasistang Armed Forces of the Philippines (AFP), Philippine National Police (PNP), Special Weapons and Tactics (SWAT), kag Criminal Investigation and Detection Group (CIDG) sa Bacolod City, Negros Occidental sadtong Oktubre 31, 2019 pasado alas 5:00 sa hapon.

Halos ang kadam-an nga mga indibidwal, mga nahanunga kag demokratikong pwera, taong simbahan upod sa mga academe ang nagpahayag sa pagkondenar diin ang mga reaksyonyong tropa sang AFP kag PNP ang ilegal nga nag-aresto kag nagdetinar sang 57 tanan ka mga aktibista halin sa hanay sang mga

mamumugon, pesante, media kag cultural workers.

Kadungan sini, ang mga kumand sang Bag-ong Hangaway sang Banwa ang mabaskog man nga nagkondenar sining ala Sauron 1 nga natabo sang December 27, 2018 kag Oplan Sauron 2 sadtong Marso 30, 2019 sa Negros Oriental nga nagresulta sang 22 ka kabuhi sang mga inosenteng sibilyan ang gin-utas kag masobra sa 50 ang ilegal nga ginpang-aresto.

Ang serye sang pasismo kag kala-kasan sang US-Duterte nga rehimen upod sa mersenaryong AFP kag PNP wala nagakahulugan nga mabaskog ini. Kundi mahuyang kag desperado ini bangud bisan isa ka larangan gerilya pabilin nga nagatindog kag lig-on nga nagahakos sang sandigan nga prinsipyo sang inaway banwa dira sa absoluto nga pagpamuno sang Partido. Padayon nga nagalunsar sang taktikal nga opensiba kadungan sa pagsulong sang agraryong rebolusyon kag sostenido nga nagakonsolida kag nagapalapad sang baseng masa. Samtang ang

malapad nga pumuluyong Negrosanon ilabe na sa Central Negros mas labi ang pagkadismaya kag diskontento sa sining tiranikal nga rehimeng Duterte.

Bangud sang mga pangako kag wala sang katumanan, wala sinsiridad sa pagpaluntad sang matuod nga kalinong nga nakabase sa hustisya sosyal, kakulang sang serbisyo sosyal, ang indi pagpatuman sang matuod nga reporma sa duta kag pungsodnon nga industriyalisasyon ang magpukaw sa pumuluyong Negrosanon sa padayon nga paghimakas serbe kontribusyon sa pagrumpag sining mapintas nga rehimen.

Sa baylo nga pamatian ang singitan sang pumuluyong Pilipino kag ihatag ang mga demokratikong demanda kag interes ginaduso pa sini ang kontra-pumuluyo kag maki-dumuluong nga mga polisiya kag patakaran pareho sang Rice Tariffication Law kag Sugar Import Liberalization nga nagresulta sang grabe nga kapigaduhon kag kagutom sang sahing anakbalhas.

“Isulong...” sa pahina 4



Madinalag-on nga Ginlunsar sang MCC-NPA ang Pulitiko-militar nga Pagpakig-away Batok sa Pasismo sang Rehimeng US-Duterte!



Madinalag-on nga ginlunsar sang Mt. Canseron Command-New People's Army (MCC-NPA) ang komprehensibo nga pakig-away batok sa pasistang merenaryong AFP kag PNP idalum sa tiraniya sang rehimeng US-Duterte. Tuyo sang rebolusyonaryong hublag paagi sa MCC-NPA upod sa malapad nga suporta sang masa nga paslawon ang todo-larga nga kampanya kontra-insurhensiya kag terorismo sang reaksyonaryong estado. Subong man paghatag sang nagakaigo kag matuod nga hustisya sa mga biktima sang paglapas sang tawhanon nga kinamatarung sa porma sang pagpamahug, ilegal nga pagpang-aresto kag pagpama-

tay paagi sa extra-judicial killings sa mga inosenteng sibilyan, mangunguma, mga aktibista kag iban pa nga mga nahanunga kag progresibong pwersa. Kabahin na diri ang wala kaluoy nga pagpatay kay Atty. Benjamin Ramos Jr. sang National Union of People's Lawyer (NUPL), ilegal nga pag-aresto sa ginakabig nga Buenavista 7 sa Himamaylan City kag iban pa nga biktima sang human rights violations sa Bindoy, Ayungon kag Manjuyod sa Negros Oriental.

Ini tanan nagsabat sa mga demanda sang pumuluyo kag nag-amot sa panawagan sang Partido Komunista sang Pilipinas sa dugang nga pagpasingki sang inaway banwa sa bug-os nga pungsod.

Sa patag militar:

Agosto 8, 2019 gin-ambus sang MCC-NPA ang mga elemento sang 62nd IB sa Sityo Buyuron, Barangay Buenavista, Himamaylan City. Patay sa opensiba si PFC Joel Parnas samtang samaron naman ang pipila sa iyang mga upisyal kag tropa. Gintabunan sa ng mga berdugong AFP ang matuod nga isip sang kaswalti sa ila nga hanay. Nakumpiska sa kaaway ang 9 ka magasin, mga bala, 2 ka bakpak kag iban pa nga kagamitan militar.

Antes pa man, ginharas sang mga Pulang Hangaway ang detachment sang AFP sa Barangay

Mahalang, Himamaylan sadtong Agosto 1. Duha ang ginreport nga kaswalti sa hanay sang militar. Gin-atake liwat sang mga myembro sang BHB ang detachment sa



Sityo Kabangahan, Barangay Hilamunan, Kabankalan City sadtong Hulyo 31, 2019. Indi mag-ubos sa 3

ang kaswalti sa mga berdugo.

Samtang nag-agum naman ang MCC-NPA sang 3 ka mga depensibang aksyon diin maisog nga napangibabawan ini:

Oktubre 3, 2019 alas 2:30 sang hapon sa sityo Cabangahan, Brgy. Bantolinao, Manjuyod, Negros Oriental, una nga ginpalukpan sang NPA ang nagahara-hara nga tropa sang 94th IBPA.

Oktubre 6, 2019 alas 5:22 sang aga sa Sityo Bugo, Brgy. Buenavista, Himamaylan City, Negros Occidental-madinalag-on nga ginsnipe sang NPA ang tuyo magreyd nga tropa sang 62nd IBPA.

Oktubre 9, 2019 alas 7:00 sang gab-i sa sityo Basak, Tan-awan, Kabankalan City sang ginsugata kag gin-engkwentro sang NPA-MCC ang gintingob kag daw “mga ido buang” nga tropa militar sang 62nd IBPA kag PNP. Resulta; 1 patay kag 3 ang samaron sa kaaway.

Sa kabilugan, wala sang kaswalti sa NPA kag labi nga napreserbar ang bug-os nga kusog sang rebolusyonaryong hublag.

Sa patag sang pulitika:

Oktubre 6, 2019-madinalag-on man nga natukod ang LAM-PKM sa isa ka hilit nga baryo sang Central Negros sa pihak sang kapaslawan sang mga kusog batalyon nga pagpang-atake militar sa baseng masa. Gintambungan ini sang 42 ka mga lider masa bilang mga representante sang 24 ka sityo diin 18 sini ang solido nga na-organisa. Sila man ang mga nagatindog nga delegado sa nasambit nga aktibidad gikan 850 ka mga organisadong masa. Diin may 1,361 ka indibidwal nga sakop sang baseng masa gikan sa ginkihad nga baryo nga nagasakop sang 1,915 nga isip sang populasyon.

Ginhimo ang pagtuon sa Rebolusyonaryong Giya sa Reporma sa Duta, obhetibo kag suhetibo kahimtang sa baryo paagi sa resulta sang SICA, pagdiskas sang mga palisiya kag pagpinalisa sang 1 ka tuig nga programa sang LAM-PKM. Madinalag-on man nga gintigayon ang demokratiko nga eleksyon paagi sa sekreto nga pagpili sang ila Tsirman kag mga kagawad nga amo ang mapwesto sa mga komitiba bilang mga Bise-tsirman sang asosasyon kaangay sang komite sa organisasyon, edukasyon, ikaayong-lawas, pinansya, depensa, arbitrasyon, ekonomiya kag produksyon, subong man kultura kag propaganda.

Malipayon kag taas moral nga nagpahayag ang mga napilian nga opisyaes dira sa malig-on, madalum kag malapad nga suporta sang masa.



“Isulong...” halin sa pahina 2

Ang wala kasolbaran nga krisis sa ekonomiya kag politika sa pungsod kaangay sang mga iskandalo sa ilegal nga droga sa tunga sang mga Ninja Cops, agaway sa poder kag luho sang mga heneral kag wala kabulusgan nga korapsyon gikan sa Build Build Build projects repleksyon lamang sang nagahuyango nga malakolonyal kag malapyudal nga sosyedad Pilipino. Kag nagabun-ag ini sang mas paborable nga kondisyon sa kadalag-an sang armadong rebolusyon dira sa pagpalig-on sang rebolusyonaryong hanay diin magadako ang isip kag mga pormasyon sang Pulang Hangaway sa absoluto nga pagpamuno sang Partido Komunista sang Pilipinas kag pagbakod kag pag-uswag sang mga napundar nga baseng masa diin maisog nga maghimakas sa katumanan sang matuod nga reporma sa duta kag punsodnon nga industrialisasyon nga may malawigon nga kalinong nga nakabase sa hustisya sosyal.

Ang NGUROB sang Mt. Cansermon

bukas nga naga-agda sa tanan nga magpadala sang inyo kontribusyon pareho sa tula, lalantunon, kag mga artikulo. Tampad gid kami magabaton sang inyo mga pagsaway kag suhestyon sa pagpalambo sini nga pampleto.

Nagpasalamat kami sa Ang Bayan para sa mga artworks ini nga edisyon.